

Tercera carta del apóstol

San Juan

Se habla bien de Gayo

¹Asa werjayín carat bah acu ayin carit uch cuihsuro. Aját bah Gayo acu ayin carit uch cuihsuro. As chihotá uní bi cajac rehquít bah sehnacro. ²Etar ajatán Sir ojcor bah cuitar conro. Bahan ohbac ítayta acu conro. Aját ítan, bah urá Sir úbotan tan wanro. Bah urá Sir ubot tan wan eyta bah ojc cat eyta tan wan chácayta acu conro. ³Gayu, Jesús chiwa cahujín usár béhjecro. Behquir car bah ojcor wajacro: “Gáyoatan Sir chihótán wácatiro,” wajacro. “Sir chihotá cutar itro,” wajacro. Bahatan Sir chihotá wácati yajquíc ehcwayat, asan ahnian to rehjecro. ⁴As quino icúr bi chihotá ehcwayat, asan ahnian étai batro. Aját síw jaquinan Sir chihotá cutar itic ehcwáyatan, asan ahnian cuitro.

⁵Gayu, as íw̄oquinu, bahatán Jesús chiwa cuitar yajcáyatan, yarsa yajcaro. Chiwa istiti eyin cuitar yajcayat, yarsa yajcaro.

⁶Chiwa istiti eyin cahujinat bah ojcor wajacro. Bahat eyin sehnác reht obir yajác, wajacro. Eyinat Sir sasá sécuajaquin quin eyta ehcujacro. Ahra eyin acsar becaro. Acsar ohbac beyin acu icúr bi táyoctar wiw̄ i. Wiquir aywi. Siran ahní rehchayta acu eyta wiquir aywi. ⁷Eyinat Jesucristo ojcor ehcún acu acsar, acsar ehcwót bécaro. Eyta beya rabar Sir sasát eyin quin wíqueya cácaro. Cuat Sir sasá bár éyinat wíqueyra cátiro. ⁸Etarwan isat cuít obir yajcátaro. Cahujinat Sir chihotá cácaiyta acu isat eyta obir yajcátaro.

La mala conducta de Diótrefes y el buen ejemplo de Demetrio

⁹Aját chiwa Sir usár bah owár sécuajaquin quin ayin carit cuihsujacro. Cuihsúr car bar áyjacro. Aját eyta cuihsu ayjac cuar, erar sera ajca Diótrefesat ria cátiro. Eya iman cara yehná racar rehquít, as chihotá cátiro. ¹⁰As erar ben séhwaro. Erar cur, aját eyat ay bár yajquey ehcunro. Eyat is cahm icar etiti sucuar tew̄ro. Is ojcor ahsín tew̄ro. Eyayi yájtiro. Chiwa cajc istiy bin becayat cat, eyin quin ténatiro. Ubach wítiro. Acsar cat cahujín quin eyin quin ten áytiro. Ubach cat

wic áytiro. Cuatán bíyinatán eyin quin ténayatan, bíyinatán eyin quin ubach wíçayatan eyin chiwa owár bin uc si ayro. Aját ey ojcor bahnác ehçunro.

¹¹Gayu, as íwoquinu, ay bár yájqueyinat yajc eyta bahatra éytara jajti jawĩi. Cuat ay yájqueyinat yajc eyta bahat cat eyta yajwĩi. Bíyinat ay yajcáyatan éyinat Sir sasaro. Bíyinat ay bár yajcáyatra eyin urá cut Sir tamo síhwãtiro.

¹²Demetrio ojcor bahnáquinat ay ehçuro. Demétrioat Sirat yajc áyjaquey chihtá uní cutar itro. Eyta itic rehquít uwat ítitan, Demetrio ayro. Aját cat ey ójcoran ay ehçuro. Aját tew̃quey baat rahçuír ítitan, aját uní wacaro.

Palabras finales

¹³Aját ba quin ehçú bahnajatro. Eyta cuar carit cuitar, bahnác cuihsú cun batro.

¹⁴Etar as bah quin ben séhwãro. Aját bah tihráy bi çunro, ba owár tew̃ín acu.

¹⁵Sirat bah ohbac ítayta acu aját ey ojcor çonro. Bah íwõquinat bah tamo síhwãro. Eyta wac ayro. Isat cat is íwõquin erar bin tamo síhwãro. Bahnaquin quin eyta wawĩi.